


TAPAK 8

Tanü Joe Biden aser Kamala Harris tenangzüktep agitsü

TAPAK 7

Ni aibelena mali, PM modi metsübur: Rahul Gandhi

VOL. XVIII NO. 96 (ADOK 96) DIMAPUR
RASEMNÜ (WEDNESDAY) AENJETI (JANUARY) 20, 2021
₹ 5.00

Governor & Dy. CM nati Khaozaosie-hok-Ah salem metetdaksür

Dimapur, January 19 (TYO): Khiamniungan nunger aser Nagaland nung alir ajak dangi Khaozaosie-Hok-Ah salem abener, ta Nagaland Governor R.N Ravi-i tanü metetdaksüogo.

"Iba benjung ajanga yimjung nung putepa alitsü, medemer ayimtsü aser putepshitsü ayongzüker. Iba benjung ajanga lanurtemi Khiamniungan nunger sobaliba balaka angazükdaksür," ta Governor R.N Ravi-isa ashi.

Nisung ajaki Covid-19 SOPs sülen anidaka iba benjung amongtsü ayongzüker, ta paisa shisem.

Maneni, Dy. CM Y Patton-ia tanga sangdong ka ajanga Khiamniungan nunger den Khaozaosie- hok-Ah salem osang metetdaksüogo.

Khaozaosie- hok- Ah benjung ya alu mapa ajak tembangba sülen amonger. Iba mapang medemer yimteper aser akangshiteper, anungji tanü lanu putuia iba sobaliba tajung angazüksü nüngdaker, ta Dy. CM Y Patton-i ashi.

State BJP legislatures tenüng nung Khiamniungan nunger den Khaozaosie- hok- Ah salem lemsateper, ta paisa metetdaksü.

Nagaland healthworkers 2,873 nem COVID-19 vaccine agütsüogo

Kohima, January 19 (TYO): Nagaland nung healthcare workers 2,873 nem Coronavirus vaccine agütsüogo, ta State Immunization Officer (SIO), Dr Ritu Thurr-i ashi.

Mongulbarnü sorkar aser nija health centers nung health workers 1,415 nem Covishield agütsüogo, ta Dr Ritu Thurr-isa metetdaksü.

Mongulbarnü Nagaland kübok sites 36 nung vaccine agütsü, ta paisa shisem.

Nagaland nung vaccination drive mezüngbuba telesa nung healthcare workers 19,690 nem

Covid vaccine agütsütsü.

Mezüng vaccine dose agiba healthcare worker ajaki anogo 28 lir külen tanabuba dose angutsü. Vaccine agiba sülen COVID-19 tetuyuba sülen anidaksüla, ta Dr Thurr-isa metetdaksü.

January 19, 2021 nü district balala nungi health care workers 1,415 nem vaccine agütsüba: Dimapur - 377, Wokha - 206, Mokokchung - 200, Zunheboto - 192, Peren - 105, Mon - 86, Phek - 76, Kohima - 69, Tuensang - 40, Kiphire - 36 aser Longleng - 27.

Ex-NDFB züngsemtem nem senotsü teyari agütsü

Guwahati, January 19 (Agencies): National Democratic Front of Bodoland (NDFB) telungpur 1,615 tashi temai adokba sülen küm ka shi süia arur, Mongulbarnü Assam sorkari parnok 1,279 nem senotsü teyari agütsüogo.

Assam Chief Minister Sarbananda Sonowal-i telungpur shia nem Rs 4 lakh (one-time financial grant) agütsü. Iba sentong nung Assam state DGP aser tanga tongti Police ketdangsürtem aden.

"Guwahati nung taoba NDFB züngsem 1,279 shia nem Rs 4 lakh teyari agütsüogo. Parnoki temai adoktsü lemtetba atema tenüngsang agütsür aser parnok nem sen teyari agütsüba ajnaga Assam renlokba nung parnokia shilem agitsü imlar" ta Sonowal-i metetdaksü.

Bodo peace accord nung sign asüba aser NDFB züngsemtem temai adokba sülen Centre aser state sorkartemi temai adoker ajak nem senotsü teyari agütsütsü nangzüka liasü.

Manipur Raj Bhavan amak

Imphal, January 19 (Agencies): Manipur nung Republic Day atema security akangshiba mapang ka nung Mongulbarnü telungpurtemi Imphal nung aliba Raj Bhavan nung hand grenade ka merepoktsü.

Mongulbar nikongdang 4:15 ako meta telungpurtem ta temolung melemi bilemer kari Raj Bhavan indang kishi tongtiba nung hand grenade ka merepoktsü. Ajisüaka, grenade ji mapok aser taonung 5:00 ako meta Manipur police bomb detection & disposal squad-i

raksaa endokogo.

Iba osang angashili state police nung tongti ketdangsürtem tesem tonga oa osang metetpela.

Raj Bhavan anüker security force dak tenük yoka iba mapa inyaktertem ano mejangja lir. Raj Bhavan ya CRPF personnel-i anüker, ta police-i ashi.

Republic Day nung mesüra matongdang telungpurtemi ozüng alema mapa inyaksü akok ta ajitetba agi Manipur nung security maparen akangshiogo. Manipur nung telungpur teloktemi Republic Day mokdanga arur.

COVID-19 Nagaland: Nisung 12,066 nungi 112 anepalur

Kohima, January 19 (TYO): Mongulbarnü Nagaland nung nisung 5 dak COVID-19 aliba putetogo aser parnok züngsema nisung ajak agi 12,066 kümogo. Maneni, tanü nisung 7 taneptsü anguba sülen tang nisung 112 anepaludar.

"Tanü nisung 5 dak COVID-19 aliba putet. Parnokji Dimapur nung 3 aser Kohima nung 2 lir. Külen, nisung 7 taneptsü angu. Parnokji Dimapur nung 5 aser Kohima nung 2 lir" ta Health & Family Welfare Director, Dr Denis Hangsing-i ashi.

Nisung 12,066 rongnungi parnok 11,724 taneptsü nguogo, ta paisa ashi.

"Nagaland nung COVID-19 nungi taneptsü angubaji 97.16% lir.

Nisung 88 asüba nungi parnok 78 coronavirus ajanga aser 10 tanga timtem ajanga asü. Külen, nisung 142 tashi tanga state temi ogo" ta Dr Hangsing-isa metetdaksü.

District balala nung COVID-19 aliba putetba: Dimapur (6,458), Kohima (3,775), Mon (605), Peren (504), Tuensang (245), Mokokchung (191), Zunheboto (142), Phek (47), Kiphire (41), Wokha (39) aser Longleng (19).

Nisung 12,066 rongnung Traced Contacts 4,973, armed forces personnel 4,665, tanga state tem nungi arur 1,856 aser Frontline Workers 572 lir, ta Dr Hangsing-isa ashi.

District balala nung tang anepalurtem: Kohima (53), Dimapur

(46), Mokokchung (11), Peren (1) aser Mon (1).

Tang anepalurtem rongnung nisung 13 dak shirangba yimya terara lir, 5 oxygen agidar aser 94 dakbo shirangba yimya kecha mali.

Taneptsü angurtem: Dimapur (6,279), Kohima (3,664), Mon (593), Peren (503), Tuensang (243), Mokokchung (171), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,23,359 tendangogo. RT-PCR ajanga sample 72,895, TrueNat ajanga sample 37,006 aser Rapid Antigen Test ajanga sample 13,449 tendang" ta Dr Hangsing-isa metetdaksü.

Subhash Chandra Bose tushia 'Parakram Diwas' amongtsü

Guwahati, January 19 (Agencies): Centre sorkari küm shia January 23 nü 'Parakram Diwas' ta süir Netaji Subhash Chandra Bose tasoba anogo amongtsü osang metetdaksüogo.

Iba osang ya union Minister Prahlad Singh Patel-i ashi.

"Netaji-i linük atema taküm bendanga agüja tenzüka tushitsü aser pa bilemtettsü atema India sorkari kümshia January 23 nü 'Parakram Diwas' amongtsü lemtetogo. Linük nung nübortem aser talisa lanurtem ajungmesotsü

atema iba anogo amongtsü" ta Joint Secretary Nirupama Kotru-i sign asüba Gazette notification nung shia lir.

January 23 nü Kolkata nung mezüngbuba 'Parakram Diwas' sentong nung Prime Minister Narendra Modi-ia shilem agitsü.

Taküm January 23 nü Netaji Subhash Chandra Bose arishi küm 125 ajungtsü.

PM Modi-isa 'Parakram Diwas' tenüng nung National Library, Kolkata nung exhibition ka

lapoktsütsü.

Külen, Union Petroleum Minister Dharmendra Pradhan-ia Cuttack, Odisha nung iba 'Parakram Diwas' sentong nung adentsü. Netaji Subhash Chandra Bose ya Cuttack nung aso.

Maneni, Gujarat kübok Haripura yimtsüng nunga sentong ka ayonga agitsü kechiyong iba tesem nung 1938 küm Indian National Congress Tir inyaksü atema Subhash Chandra Bose shima liasü.

Education ministry-i JEE Main 2021-22 atema eligibility criteria agiener

Guwahati, January 19 (Agencies): Union education ministry-i JEE (Main) 2021-22 atema Class 12 examination indang marks 75% eligibility criteria agienba osang metetdaksüogo.

Taoba academic year nung IIT JEE (Advanced) atema telemtetba agiba den kasa Union education ministry-i iba ya lemtetogo.

Taruba academic year 2021-2022 atema NITs, IIITs, SPAs aser

tanga CFTIs nung Joint Entrance Examination (Main) atema Class 12 examination nung 75% marks angutsüla ta lateta aliba agiener, ta education ministry-i metetdaksü.

National Testing Agency (NTA) ajanga JEE (Main) nung takok anguba nung ajemdaker India nung National Institutes of Technology (NITs), Indian Institute of Engineering Science and Technology (IIEST), Shibpur

(West Bengal) aser tanga Centrally Funded Technical Institutions (CFTIs - excluding IITs) nung kaketshirtemi admission asür. Ajisüaka, takümbo 75% marks indang eligibility criteria malitsü.

Taoba mapang IITs/NITs/IIITs aser tanga CFTIs nung 75% marks tema angur dang admit asütsü melaa liasü. Külen, SC/ST students atema Class 12th exam nung qualifying mark ji 65% liasü.

PM Modi-i Assam semdangdang AASU züngsemtemi lungkak aittsü

Dibrugarh, January 19 (Agencies): All Assam Students' Union (AASU)-i Assam nung Anti-Citizenship Amendment Act (CAA) tenzüksütsü renemogo.

January 22, 2021 nungi AASU-i CAA anema lungkak aitba sentongtem agitsü osang metetdaksüogo.

AASU-i Assam kübok district shia nung CAA agienang ta takhangba agüja lungkak aittsü, ta AASU President Dipanka Nath-i Dibrugarh semdangdang ashi.

"CAA magien tashi onoki CAA anema noktakba manentsü. January 22 nungi onoki Assam ajungalen anogo asemnü lungkak aitba sentong tenzüksü" ta Dipanka Nath-i ashi.

January 22 nü AASU-i Assam

kübok district shia nung torch rallies tululu ayonga agitsü.

January 23 nü AASU züngsemtemi CAA magizüker ta sayua badge tanak khaloker lungkak aittsü.

Prime Minister Narendra Modi-i January 23 nü Assam kübok Sivasagar semdangtsü sentong lir. Modi-i Jerenga Pathar nung sentong ka agidang nisung lakh 1 tema nem ali patta agütsütsü.

"Prime Minister Narendra Modi-i Sivasagar nung sentong ka nung adentsü atema arutsü. Idangji pai taoba mapang inyakba ama Assam nunger dang tiyazü tenangzükbatem agitsü" ta Nath-isa ashi.

January 24 nü AASU züngsemtemi CAA indang copy

tem rongdoktsü aser district sha nung wako tanak atsükettsü.

"Ozü oshi, sobaliba aser maitsü lendongbang nung lir. Sorkari Assam Accord alema Assam nung CAA benoktsü makok. Iba Act ya nübortem aser democracy anema lir" ta AASU General Secretary Shankar Jyoti Baruah-ia ashi.

AASU-isa Assam nung BJP sorkar aika jembidang tesüiba küm 5 sorkar yimsü süa arudang India-Bangladesh arrtsü meshibangba indang ashi.

"2016 küm Assembly Elections nung Sarbananda Sonowal-i aniba BJP sorkari Indo-Bangla arrtsü shibangtsü nangzüker, saka küm 5 tashi sorkar yimsü süa aruaka parnoki ibaji meinyak" ta AASU Tir Nath-isa metetdaksü.

'Mkg Growth Centre' ajanga dist nûbur nem lenla balala nung maongka lapoktsür



Mokokchung, Jan 18 (TYO): Mokokchung nung tang nûburtemi kanga bulua jembiba riju kaji 'Mokokchung Growth Centre' ya asütsü. Iba centre ajanga "strive to live" omen nung ajemdaker kaketshirtem nem India lima talangi moi pei atep nung mener digital technology (V-SAT) ajanga tangalen ama chichiba education agütsüba maparen inyaker. Iba maparen ya Mokokchung district atemabo otsütsüsa mezügbuba lir.

Tangji iba centre (MGC) ajanga inyakba tongtibang mapatong ana inyaker; kaji 'Mokokchung Growth Centre - Eden Academy Coaching Classes for National Eligibility cum Entrance Test (NEET), Joint Entrance Examination (JEE) aser Nagaland State Entrance Examination (NSEE) amala technical tatidang atema tesayuba agütsür, aser iba ya 2018 November nung tenzük. Iba coaching ya Class 12 (Science) zünger alir shirnok tatidang balala ajanga takok ngur pei jangraba luyim (branch) balalai onür, parnok asoshi lir. Iba coaching ya V-SAT (online) ajanga Delhi nungi tesayur mongintemi sayur.

Iba coaching ya tenzük talangkabo masü saka tang tashi nung yangi nungi NEET nisung 3, JEE nisung 6 aser NSEE nisung 3-i ajangtetogo, ta Mokokchung Growth Centre anepalur kati iba osangbener den jembidang ashi. NEET

takok angur rongnung katibo 2020 kûmto MBBS (doctor) azüangi aotsü jenjang ajangzükteta iba centre asoshi konang bener arutsüogo. JEE nungi nisung 2 Civil Engineer, 1 Mechanical Engineer aser 1 Architect Engineer ta adokogo, aser NSEE nung adokertem parnok 3-ji; Agri B. Sc, Pharmacist aser ka Laboratory Technology ta adoka tazüangi ogo. Iba coaching ya kûm shia March nungisa tenzük.

Mokokchung Growth Centre-i inyakba mapatong tanabubaji; Civil Services (UPSC/NPSC) tetoktepba nung jangrartem asoshi 2019 August ita nungi "ALS (Alternative Learning System) IAS coaching classes" ta sür ka coaching class ka tenzûka odor. Iba ya kûm shia June – July meta nungisa tenzük. Iba coaching nung mezüing batch purji parnok 23 aser tanabuba batch pur 8 lir. Parnok shinga ano tatidang khena magütsü lir.

ALS coaching ya Delhi nungi V-SAT ajanga live sayur aser yangi tesayurtemji India lima nüngtugu civil service tatidang nung mongintem teas lir. ALS ya India nung civil service tsütsü coaching class agütsüba rongnung tajungtiba ka ta züingshir. Tsüingdong Delhi tashi maoyonga yangji or agir amai Mokokchung centre nungi angazük aser Delhi nung tesayurtem den sensaksemter aser mangatetbatem asüingdangteter. Ano tajung kaji

tang ya alima tensa mesüingjemba ajanga marur dangashi, ALS Delhi nungi tesayurtemji mapang shia Mokokchung centre-i arua class agir. Aji oda, alima süngjema kûmra parnokji arutsü, ta ALS achayangerisa ashi.

Mokokchung Growth Centre ya Nagaland RD Minister, Wb. Metsübo Jamir aser par jabaso Nagaland Minerals & Mines, CEO, Sb. Temjenmoa Jamir nati nûkla tulu yur bener aruba lir, aser bener aruba dang masü saka item coaching atema Admission/ Course fee-jia shilem (percentage) teimba tenati inoktsür, ta angazük. Ibaji ajanga kaketshirtem aser tsüraburtem khuret kanga pongbatsür.

Iba centre ya nükjidong tulu yur tenzükba ama, mapang tatsüka tsüingda nung meilongi asünunga nükjidong ataloka aoba ngua nûburtemi pelaa repranger aser tajungba aotsü imlar. Yamaji iba ya ajanga Mokokchung district nûburtem talisa koda masür kaketshirtem lenla aisü nung tajangzük ngudaki. Iba centre lapokba ajanga meta talangi rongsen jenti intoka maoyonga aser chirnurtem meta talangi yoker tsüraburtem shisabuluba kecha meli, pei atep nung ayongayonga mener India nung nüngtugu tesayurtemi sayuba angazüktsübaji koda jangratemsü. Anungji, nûburtemi iba maongkaji raktepa agitsüla.

Republic Day anogomung atema Dimapur nung senden amen



Deputy Commissioner, Dimapur, Rajesh Soundararajan IAS ajanga DC Dimapur indang Conference Hall nung January 18, 2021 nü Dimapur kübok HODs aser administrative officers den senden amendang jembiba noksa nung angur.

Dimapur, Aenjeti/January 19 (TYO): Deputy Commissioner, Dimapur, Rajesh Soundararajan IAS ajanga Dimapur district kübok aliba HODs aser administrative officer tem den senden ka January 18, 2021 nü Deputy Commissioner, Dimapur indang Conference Hall nung ayongzüka mena liasü. Iba senden ya Deputy Commissioner, Dimapur mendenpuba sür Republic Day anogomung sentong yanglutsü

atema mena liasü.

Iba senden nung DC Dimapur ajanga Republic Day anogomung mapang amshitsü totuyubatem Home Department nungi agütsüba indang rasaa ashi. Department balala nem seat arrangement, decorations, PA system, welcome gate yanglutsü, law and order amala mapalem lezmükja liasü.

Tashidak wara aliba mechi Home Department totuyuba nung reju balala semdangtsü

memelar, ta DC-i metetdaksü.

Deputy Commissioner, Dimapur ajanga department ajak dang iba anogomung takok nung mungtettsü atema mapa tem nendaka agüja inyaksü ajungshia liasü.

Sentong mapang amshitsü atema sentong agiba tesem nung Rotary Club Dimapur ajanga mask 1000 tenla agütsütsü, ta Rotary Club Dimapur tir, Chandu Agarwal-i metetdaksü.

Sorkar department ajak dang Govt. Business proposed meshir

Dimapur, Aenjeti/January 19 (TYO): 13 buba Nagaland Legislative Assembly indang session tenet buba ya February 12, 2021 nungi tenzüksü lir. Anungji Parliamentary Affairs department ajanga sorkar department ajunga dang Session mapang jembitsü atema Government Business (Financial and Non-Financial) proposed tem agütsütsü aser kasaji Parliamentary Affairs department tenüng nung

Assembly Secretariat nem indang indanga temonutiba agi February 1, 2021 anogo tashinung tsüinglanglen agüja aliba format nung agütsütsü mepishia metetdaksüogo.

Sl. No, Description of Business, Department Concerned, Minister Concerned

Department ajak dang item business ajunga ya soft copies/ digital formats (Pen Drives mesüra CD/DVD) nung agütsütsü metetdaksü.

Deputy Commissioner Kohima den tepila sentong agi



Dimapur, Aenjeti/January 19 (TYO): Deputy Commissioner, Kohima menden yutsüsang Mohammed Ali Shihab A IAS nem akhum agüja tepila sentong ka January 19, 2021 nü Deputy Commissioner indang Conference Hall nung agia liasü.

DC mapa yutsüsang-i tepila o jembiba mapang pa dang temeim sayua yariba atema ajak dang pelaba lemsatep. Pa DC inyakba mapang district nung kechi takok sa ngutetogo, ibai ajak lungjemer shilem agiba ajanga lir, ta pai ashi aser maparen balala nung takok angutsü asoshi yaritepba atema Angami Public Organisation, Rengma Hoho, organisations/ agencies balala, GBs, DBs, pa indang administrative officers aser line Department tem dang pelaba lemsatep.

District nung tang maparen balala teinyakdak aliba dak sendakba nung Mohammed Ali-i ashiba agi, Principal Secretary CM, ANSU, Science College Principal & team aser Village Council Jotsoma nungi lungjemer yariba ajanga Kohima Science College nung ali ken o dak sendakba nung mera agitsü atema Cabinet-i December 18, 2020 nü agizükogo.

Paisa tang Kohima nung lenmang teyangludak aliba kar indang süoka jembia aser item maparen tekeratiba nung takok ngua renemtsü amanger, ta ashi.

Officer aser staff tem tenüng nung Additional Deputy Commissioner Kohima, Lithrongla Tongpi Rutsa-i jembiba mapang DC menden nungi alusangi temaba

ketdangsür den tesendaktep junga aliba atema temolung süa agizükba lemsatep aser pa lenisüba kübok maparen aika tekeratiba nung renemogo, ta ashi.

COVID-19 tashidak wara agi muketbanger Southern Angami Bye Election atema nomination agitepba mapang pa DC ka ama October 9, 2020 nung arua liasü, ta lai ashi.

Pai item khuret molungsoa agizük aser pa lenisüba kübok COVID protocol ajunga amshia tajungtiba nung election agitet, ta ashi.

Pa lenisüba kübok tang tashidak wara agi tesem ajunga sünga liaka Deputy Commissioner indang office nung inyaker atema Departmental Promotion Committee (DPC) ya benoka Cabinet nunga agizük, ta ADC ajangasa ashi.

Iba sentong nungsa Superintendent of Police Kohima, Manoj Kumar-i jembiba mapang Mohammed Ali-i yimya tajung nung mapa inyakbatem saklokba indang lemsatepa liasü.

Mapa tatsüka dang inyakaka pai shilem tajung agia mapa jenti nung takok nguogo, aser pai bendanga agüja aser nendaka inyakba yimyatam asenokia amshitsüla, ta Mohammed Ali nem pai tenüingsang agütsü aser lokti ayongzüka liasü.

Iba tepila sentong nung EAC (Sadar), Kevingoto Kulnu menden liasü aser Ketuoravi Marina ajanga Tsüngrem temoatsü jazüka sarasadem. Maneni Deputy Commissioner office, Kohima nung inyaker Dobashi temi temeja ken ka tena liasü.

CPI(M) züingsemtemi police headquarters makbang



Tanü CPIM lennirtem aser züingsetemi police headquarters jakdang adenshir aliba noksa nung angur. (Agartala, Jan 19, 2021)

Agartala, January 19 (Agencies): Mongulbarnü CPI(M) lennirtemi Agartala nung police headquarters makbanger lungkak ait.

Tripura kübok tesem balala CPI(M) lennirtem, pusemertem, züingsemtem aser party office tem kanga amakba anema parnoki lungkak ait.

Tanü CPIM lennirtem aser züingsetemi police headquarters jakdang adenshir ghonda ka ser tesadang ka shi lungkak aita liasü.

Hombarnü taoba Tripura chief minister Manik Sarkar-i anir CPI(M) MLA tem aser party züingsemtemi Governor den ajurutepa state nung

opposition party tem amakba atema tebang aitsü mepishia liasü.

January 17 nü nisung kari CPI(M) MP Jhanra Das Baidya aser Congress state president Pijush Biswas amak.

Kasa anogo nung CPI(M) office asem tashi raksatsü aser party züingsem aika dak azük.

"BJP-i pusema nungitba nisungtemi state nung political party balala lennirtem amaker" ta CPI(M) state secretary Gautam Das-i ashi.

"Police-i parnok anema mapa inyaksü nungnanger" ta paisa ashi.

Tripura chief minister Biplab

Kumar Deb-i opposition party lennirtem amaksü atema nisungtem ajungmeso ta Das-isa tai tongloksü.

"Onok tanü police headquarter-i arur police dang iba kiralongraba maparen kobika inyaksü ta asüingdang" ta paisa metetdaksü.

Iba sülen police ketdangsürtemi CPI(M) lennirtem den ajurutep aser aibelenertem merenshitsü nangzük.

Külen, Jharna Das Baidya-i Vice President aser Rajya Sabha ex-officio chairman, M. Venkaia Naidu dangi Badharghat nung lar kidang atalokba osang indang shidi ka zülüogo.

State sorkari 'Visit Sikkim' 2022 sentong atonger

Gangtok, January 19 (Agencies): Sikkim nung tourism industry asentenshitsü atema state sorkari 2022 ji 'Visit Sikkim' year ta asütsü telemetba agiogo.

COVID-19 wara ajanga kongshiba sülen Sikkim Chief Minister PS Golay-i ashiba agi "Sorkari Sikkim nung tourism industry jenjang mejungi aliba

shia arudaksütsü."

"Visit Sikkim 2022 ya state nung tourism industry ajungkettsü atema lir. Onoki 2022 küm piyong alima tesem balala nungi tourist tem pelashishia agizüktsü" ta PS Golay-i ashi.

"Ozü sorkari Gangtok nung Travel Agents' Association of

Sikkim (TASS) den asüingdangyadar aser alima nung Sikkim state indang tourism ajungkettsü" ta Sikkim Chief Minister-isa metetdaksü.

"Economic Revival Committee-i report nung agütsüba nung aliba ama onoki tourism industry shi arudaksütsü" ta paisa shisem.



Assam Congress Tir Ripun Bora-i CPI (Communist Party of India), CPI(M) Communist Party of India-Marxist, AGM (Anchalik Gana Morcha) , AIUDF (All India United Democratic Front) aser CPIML (Communist Party of India (Marxist-Leninist-Liberation) lennirtem den senden amendang agiba noksa angur. Assam nung Bharatiya Janata Party (BJP)-i aniba sorkar atsüingdoktsü atema onok külemi election nung tokteptsü ta Bora-i ashi. CAA anema tawa Assam nung party tasen ana tentetba-Rajjor Dol aser Assam Jatiya Parishad atema asüingdangdang 'kasa tangatetba aliba teloktem atema kishi lapoka dang lir' ta Bora-i langzü. (Guwahati, January 19)

Tripura nung 43 buba Kokborok Day among

Agartala, January 19 (Agencies): Tripura yimtiba Agartala nung tanü "43 buba Kokborok Day mongogo.

Tanep Umakanta Academy, Agartala nung nisung aika pei sobaliba sübotsü agir adenshi aser yimdong süa senzüba sentong nung shilem agi.

Kokborok ya Tripura nung tetsü oshi lir aser Tripuri nungeri küm meyrjang aika jembia arur. 'Kok' tetezü oshi aser 'Borok' tetezü nübortem.

Tripura nung chief minister Nripen Chakraborty-i anir mezüingbuba Left Front sorkari Kokborok ya state indang official language asütsü ta agizüka liasü.

Iba bill ya January 19, 1979 nü Tripura legislative assembly nung agizük.

"Sorkari asalentong aika tenzüka lir aser tang onoki oshi atema policy ka yanglunür" ta Tripura education minister Ratan Lal Nath-i tanü

metetdaksü.

Küm 300 tejaklen Tripura nung King Mahendra Deb Barma-i yimsü asüadang Kokborok language zülutsü tenzüka, ta paisa ashi.

"State sorkari postgraduate level nung Kokborok tesayurtem anioktsü atema sangdongogo.

Tang tashi nung nisung anati dang application agüja lir" ta Ratan Lal Nath-isa metetdaksü.

Kokborok oshi samaa aoer aser nübor ajaki iba oshi kümzüka ayutsü aser ajungkettsü atema mapa inyaksüla, ta paisa ayongzük.

Tripura sorkarisa higher secondary nungi post-graduate levels nung Kokborok oshi nung mark tajung angur nem senpet agütsütsü telemetba agiogo.

Tripura nung Kokborok oshi ya Tripuri, Jamatia, Noatia, Kalai, Riang aser tanga kin aikati jembir. Tripura nung lisopur 70 nungi 75% shi kati iba oshi jembir.

Manipur & Assam nung nisung aika BJP nung aden

Guwahati/Dhubri, January 19 (Agencies): Mongulbarnü Mnaipur kübok Kakching district nung BJP-i züingsem tasen aniokba sentong ka ayongzüka agiogo.

Kakching Khunou nung BJP-i political party balala nungi züingsem tasentem aniokba sentongji agi.

Manipur chief minister N Biren Singh-i Twitter nung züingsem tasentem pelaa agizükba osang metetdaksü.

BJP-i Kakching district kübok Kakching Khunou, Sugnu aser Pangaltabi nung züingsem tasentem aniokba maparen ka inyaka liasü.

Political party balala nungi nisungtemi Prime Minister Narendra Modi lenisüba nung tamang akaba ajanga BJP nung denogo, ta Biren Singh-i metetdaksü.

ASSAM: Tesüiba ita ishika tsüingda Dhubri, Gauripur aser Golakganj assembly constituency tem nung AIUDF aser Congress züingsem 5000 tema BJP nung denogo.

BJP-i item constituency asem nung züingsem tasentem anioktsü atema membership drive inyak.

BJP-i Gauripur constituency

nungi Bodoland People's Front (BPF) züingsem 500 shi ka aniokogo, ta Hombarnü Dhubri district president Debamoy Sanyal-i ashi.

1996 nungi 2016 tashi Gauripur constituency nungi asemben tashi MLA inyaker BPF lennir Banendra Kumar Mushary-ia Hombarnü BJP nung aden.

Gauripur kübok Public Library nung sentong ka agidang pai BJP züingsem aküm.

BPF-i Gauripur constituency nung tashi liasü saka 2016 assembly election nung AIUDF candidate Nijanur Rahman-i Mushary madak takok ngua liasü.

Iba sentong nung Dhubri district vice-president Prasanjit Dutta, general secretary Bhagirat Ojha aser general secretary Bishwajit Roy na den party lennir aika aden.

"Onoki Dhubri, Gauripur aser Golakganj assembly menden asemprong nung takok angutsü atema mapa meranga inyaker aser onoki iba ya Mission Three ta jaloktsüogo" ta Sanyal-i ashi.

Dhubri election district kübok assembly constituency 3 nungi BJP MLA ka dang lir. BJP MLA ji Golakganj nungi lir aser Dhubri o Gauripur constituency tem nungi AIUDF MLA ana lir.

GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND: KOHIMA

NO.DHFW-5/TRG/STIPEND MISC/2019/6760-65 / Dated, Kohima the 19th Jan' 2021.

NOTIFICATION ON SCHOLARSHIP SCHEME FOR STUDENTS UNDER THE DEPARTMENT OF HEALTH & FAMILY WELFARE

It is hereby notified to all the students and institutions that :-

- The common scholarship portal for scholarship schemes for students under the department of Health & Family welfare will go live (active) from 22nd of Jan 2021 till 28th Feb 2021 via common scholarship portal of the Government of Nagaland, under URL <https://scholarship.nagaland.gov.in>
- The department will not accept any self application as it has been made online from the academic session 2019-20.
- Students & institutions are instructed to go through the guidelines in the given portal for necessary instruction.

(DR. VIZOLIE Z.SUOKHRIE)
Principal Director
Dte.of Health & Family Welfare
Nagaland,Kohima.

Issued by DIPR

GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA

NOTIFICATION

This is to inform NEET(UG)-2020 qualified candidates who are interested to pursue undergraduate degree course in MLT (B. Sc. Medical Laboratory Technology) under Regional Institute of Medical Sciences, Imphal against the seat allotted to North East States are informed to directly apply through website: www.rims.edu.in on or before the last date of 25thJanuary, 2021upto 4:00 PM.

(Er. VipulhouLhoungu)
Joint Director.

Issued by DIPR



TIR YIMYIM YIMOBILEM (EDITORIAL)

DIMAPUR RASEMNÜ, AENJETI (JANUARY) 20, 2021

TETSÜBU AGIENER TANGATETBA AGÜTSÜTSÜLA

Alima nung nisungtem jakla ya ngur Tsüngrema komaka bilema alitsü ta aiben shisadanger, kechiyong anü pura nisungtemi tsünglu aginür aser tsünglu yokra anü pudaktsüner. Kasaji, tanü alima ajunga nung tetsübutsu tashidak Covid-19 agi amokmeren dangbo mozü nungdakba indang jembisaka ano tang mozü nguteta agütsütsü tenzük dangbo, ano mozüjemji agitsüang tetsübuba kümogo. Shinga tama aginür mali ajak tangar agiba sülen parnok dakji kecha timtem lendong matalok nung dang agitsü purtetsa kümogo. Atangji, tsübuang tetsübu sentongi anir asünungji, mozü kidang inyakertembo ajak Covid mozü agi tenzükogo aser tang tashi asen lima nungbo Covid jem agiba ajanga lendong timtem atalokba osangbo mangashi. Asenok ajak asoshi osang tajungtibaji aji asütsü. Joko, mozü kidang inyakertem ajak agiba sülen tanüngba nübortema kar khen, kar khen ta agiyonga aotsü, idangji dang asenoki corona virus tashidak mesenji tizükteta sademsadema akhi alu mapa inyaka litettsü. Ajisüaka, tang tashi nunga nisung aikati Covid-19 ajem agitsüba ya tsübur, anungji iba tetsübuji nisungtem mulungjang nungi odaktsütsü asoshi akok tashi government-i osangtsüsang prokshiba maparen tapu balala ajanga tangatetba agütsütsü tim. Nisungtemi mozüjem tasen ka agitsü tsübubaji, shidi süra, tim dang lir, kechiyong iba mozü jagi tashidak akoktsü asü makoktsüar ano memetet aser mejangja, iba denji ano olulu tapu balala jembir. Ajisüaka, asenoki angatetsüba kaji, koba mozü südir süang, teyanglurtemi tapi agi sen ajangzüksü aser tenüng agitsüba kisüng bilema nübortem nem mozü mashimashika yanglur magütsür. Mozü yanglurtemi yangluba mozü agi nisung kar dak danga lendong atalok nungbo, parnok teyanglurtem asoshijiang lendong tuluba lir. Ibaji temulung nung yur aser tenangzüba nung, tashidak tasen poktet shia, nübortem nem mozü tasen tasen yanglua agütsür. Aji oda, tang amshiba covid mozü Covishield aser Covaxin na pronglayaa jungjunga tendanger külenang nübortem nem agütsütsü temelaba agütsür. Atangji, mozü tzü tasen ka temangi yoker asünungji, koba mozüjem südirsüang, temang nung tapu balala ataloktsüa akok aser karbo kanga shiranga aittsüa akok, ajisüaka itemji temang nung mozü tzü jagi mapa inyaker asütsü, anungji mozü kidang doctortem itemji repranga anepalutsü. Tang alima nung tebilemtsü kaji, covid-19 mozüjem agitsü tsübuba agi nisung teimbakati magi nungbo, asenoki Covid-19 tashidak anema takok ngua meraratettsü. Ano, asenoki metettsüba tongtibang kaji, tang agiba mozü ya Covid-19 tashidak agi shiranger aneptsüba mozü masü saka nokdangtsüba mozü lir, anungji tang tashibo Covid-19 agi shirangertem yaritsüsabo mozü tejangja ka maka. Tebilemtsüji aji lir, kechiyong Covid-19 mozüjem tsübuba agi magirtem dak iba tashidak wara agi kongshi nungbo asenoki athitsüla masüka tesama aser takoksa ajurutsü. Item tama ngutsü lendongtem ataloktsüa asen jakdang anendaka alinungji, state government-i anogo shia nübortem nem tangatetba agüja olulu aser tiyazü shinba mapatem nungi nisungtem kümzüksüla. Covid-19 tashidak memenatsü atema ajak dang tama mozü kidang inyakertem Covid-19 jem agia tenzükbaaji ajak atema kuli tajung lir. Iba jagi Covid-19 mozüjem dak lendong malia, anungji tetsübu ta ajak nem tangatetba agütsür. Atangji, Covid-19 jem ya shinga daka kangshia agütsütsü makok, peii mulung nung dang agitsü, anungji nisung ajaki tangatetba agi pei taküm dang masü saka külem lisemertem ajak taküm kümzüksü nükjidong nung mulungsua agiteptsüa nübortem nem anogo shia tangatetba agüja anidaktsübaaji, government nung alirtem asoshi teinyaktsü sentong tongtibang ka asütsü. Ano külen, nübortem rongnunga nisung shingaia jungjunga mejangjatepi tebilemba agi mesüra noksa nung anguba kisüng agi, osangtsüsang aser noksa kecha shitak kuma meprokshitsüla.

OLEMSABANG

CHANGTONGYA NUNG LISO AREM SÜNGJANGLIJANGLU KA NÜBURTEM NEM LAPOKTSÜOGO

~ Founder Director Sentirenba

Aori alemli nungi liso arem süngjanglijang chia aruba ajak alu ka nung tsünüteta Aruju Tsuki Bachelor's-Dormitory teloki nüburtem nem Aenjeti (January) 6 nü lapoktsüogo.

"Iba ya arem süngjanglijang mesamadaktsüi wazüka ayuba den shisashirtem alima balala nungi tebushidangba balala alidang timtem majurutsü asoshi tajung ka asütsü, item süngjanglijang rongnung Aori mozü süa amshia arubatema lir.

Iba alu ya Govt. teyari kecha medeni tsünü. Govt. teyari medenaka nisung timbai alima aser Govt. ajungtsü asoshi inyaktettsü koka lir. Govt. teyarjia nungdak saka yamala maparen asoshi teloki meshimetsüa mesüra senpettsüpetta mesenzütsü.

Teloki meshimetsüba aser tangar dak dang imlar aliba nungi pilatsü tongtibang ta angateta tongtibang nisung mesüra tulur mejaoki dang iba ya lapoktsür, tamalena iba kasa teloki Arju ka yanglua, yangji tetsü tebou osettem bendena rezünga yua lir, ibajia mejeta jaoker shinga melii dang sarasademer lapok aser ano tarutsü nunga yamaji dang aotsü" ta iba telok nung shisatuyur S. T. Yapang Lkr ajanga shia liasü.

Founder & Director Sentirenbai ashiba agi "Arem Süngjanglijang alu moapui bener adoka atembaji aika asü, karbo arem shirururi tedong tila asüngdang mejak, anungji ano temshitsüa ishika lir, ibaji 2021 kümsta temshitsü. Süngjanglijangtem ya tamalen atemba ishika tangdar, saka ajak nung atangtsüsabo küm pungu nungi ter shi nung dang tangtettsü südi." Ano paisa, "Kaketshirtem amala iba lu reprangi arunüra arujutsukibachelorsdormitory@gmail.com ajanga osang agiteptettsü" metetdakja liasü.

Tang kümteta alibatem

1. Sürajang
2. Asongshi
3. Aitjang
4. Mezünglashi
5. Nangjalashi
6. Meyitiong
7. Süngku meyitiong
8. Lozü tuluba
9. Lozü tilaba
10. Ashi
11. Kümer
12. Metang
13. Monguzünung
14. Mongujang (Remshi)
15. Süzüng/shizüng
16. Anjongmetsüla
17. Tsürem
18. Pishishi
19. Süngkongerjang
20. Tangshi temesüngla
21. Tangshi temeremla
22. Septsüjang
23. Tangmo
24. Jinajang tuluba
25. Süklepshi
26. Halilaha
27. Tazüangi (Akudong)
28. Tazüangi (tezü)
29. Nangka/Nangkaji
30. Bangsemjang
31. Mentitila
32. Zükjem
33. Mongmongjang
34. Alongjang tuluba
35. Alongjang tilaba
36. Tsüngremshi
37. Harshi

38. Tsülaki
39. Lijok
40. Kazüi
41. Asürzüngi
42. Menaklashi
43. Warusü
44. Angetjang
45. Jakjaklashi
46. Mesüjang
47. Arjang
48. Merlashi tuluba
49. Milemjang
50. Chibulashi
51. Shimen
52. Kümhang
53. Okshi
54. Arlashi

Tasüba/Arem shirurui chitsübatem

1. Mera
2. Pongjangteti
3. Mayangjang
4. Merlashi tilaba
5. Makomashi
6. Yangkulashi
7. Shongshishi
8. Wareplashi
9. Nashimamazü
10. Napongsüsüjang
11. Ongetjang
12. Akujang
13. Pesholjang
14. Jinajang tilaba
15. Monguzünung tilaba
16. Bangsemjang temeremla
17. Alishijang
18. Kilangjangpok
19. Yangzüjang

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

2020 kûm India nung Khristantem anema inyakba tatalokba 327 liasü



Jharkhand state nung Ranchi district kübok Garh Khatanga yimdak Hindu yimsü alia amangertem aser tribal yimsü amangertemi Khristantem Tenla ki (abelen noksa) agi Sarna religion complex küma yanglushir tangokba noksa nung angur.

January 19, 2021: Evangelical Fellowship of India (EFI)-i, 2020 kûm India linük nung Khristantem anema inyakba tatalokba ken o 327 liasü; yakûm coronavirus wara ajanga linük ita aika shibangyonga Khristantem anema inyakba manen, ta metetdaksü.

India (International Christian Concern) den jembidang Evangelical Fellowship of India-i, 2020 kûm India nung Khristantem anema inyakba tatalokba ken o 327 liasü; item rongnung Khristantem tepsetba ken o pongu, Tenla ki trok

rondoktsüba ken otem aser tekülem sentong tagidak mapang nung Khristantem amakba ken otem densema lir, ta metetdaksü.

EFI-isa, Khristan asübayong yimdak mesüra kiyong nung yimertemi Khristantem lenla ajak nung sendokba ken o 26 liasü, ta metetdaksü.

EFI report ajanga India linük nung maneni Khristantem anema inyakba metetdaksü.

2014 kûm Centre nung BJP-i aniba teloktep sorkar akümba sülen Khristantem anema inyakba tatalokbatem anasü agi timba kûmogo, ta EFI-i metetdaksü.

Andhra Pradesh nung police-i Pastor, Praveen Chakravarthy apu

New Delhi, January 19 (Agencies): India kübok Andhra Pradesh state nung pastor kati Hindu nunger tsüngremtem anema video ka yangluba atema police-i pa apu.

Kakinada nungi pastor, Praveen Chakravarthy-i Hindu nunger tsüngremtem mezüngmeshia tetsüing agi metsüba video ka yanglu aser pai-a iba aibelen inyakba nangzükogo; police-i pa January 12, 2021 nü puogo, ta police-i metetdaksü.

Osangbener den jembidang Kakinada Church of Christ nung pastor, Joseph Benjamin Gootam-i, Kin aser tamangba yimsü nung ajemdaker telemsa adokdaksütsü merangba Hindu telok kar lir aser parnoki kangshia parnok tangatetbatem benoktsü meranger," ta ashi.

"State nung nisung kari Chief Minister anema-a inyaktsü meranger, aser Chief Minister-i minority tem, talisa Khristantem pusema inyaker ta aitsür, kechiyong pa-a (Chief Minister) Khristan lir," ta pastor, Joseph-isa metetdaksü.

"Pastor Praveen Chakravarthy apuba atema ni

kanga süngmanger, kechiyong iba ken o ya kanga tejen, saka nisung kari tawa asentenshia iba ken o police matsüingdang benok. Onoki judiciary nung tamang akar aser bushisüingdangba ajanga pastor anema tai kuli mangutsü ta onoki imlar," ta paisa ashi.

Ano külen osangbenertem den jembidang Superintendent of Police, R. Vijaya Paul-i, pastor anema ken o benokba sülen police-i pa apu, ta metetdaksü.

"Iba ken o ya 2013 kûm atalokba lir, ajisüaka iba mapang nungji ken o mebenok. Tawa ang iba ken o benokba sülen onoki iba ken o asadanger pastor apu," ta police ketdangserisa metetdaksü.

"Iba video nung aliba olaji pastor ola ta pai-a nangzükogo. Iba video ya kanga tejen saka nisung jashidaksütsüsa lir aser onoki iba ken o bushisüingdangdar," ta paisa shisem.

Penal Code kübok Arrla 153 A aser tanga Arrla balala nung ajemdaker pastor apu.

Ano külen BJP nungi Sunil

Deodhar-i, pastor Chakravarthy -i yim 699 nung nisungtem Khristan yimsü dangi meyipdaksü aser pa kübok pastor 3,600-i mapa inyaker, ta aitsü.

2014 kûm Telangana aser Andhra Pradesh na melemsadang Andhra Pradesh nung Khristan nütsüing million 1.17 liasü (2011 census).

Andhra Pradesh nung Khristantem timbaka tzüyimkümlen aliba districts aser yimtsüingtem nung lir.

1971 kûm iba state nung Khristan nütsüing shilem 4.39 liasü saka 2011 kûm nungbo state nung Khristan nütsüing shilem 1.34 dang kûmogo.

Research agirtemi ashiba agi, 1971 kûm tashi state nung Khristan nütsüing kanga renloka liasü, ajisüaka sensaker Khristantemi sorkar teyari balala angutsü atema tanemtanemi parnoki parnok Hindu nunger ta sangdonga liasü.

2013 kûm All India Christian Council-i, 2013 kûm India nung Khristantem anema inyakba tatalokba timtiba aliba state ji Andhra Pradesh lir, ta sangdonga liasü.

ANO GO ABEN TSÜNGREM DEN

Taochi maka temeim Hosea 3:1

Tsüngremi par chirtem meimba meimchiri angajemtsü makok. Asen telatet temeimi Tsüngremi kecha jenjang makai asenok meimba angatettsü tsükdanger. Hosea takûm nung asenoki iba temeim noksa angutsü akok.

Hosea temeshi nisung ka liasü, saka temenentsür ka den satitsü Tsüngremi ashi. Hoseai tashi Gomer pa kinüngtsü asütsü agi. Pai la peladaktsü aser akhûm tsübua ali. Temalen lai iba ama temeim ajangshia mar, saka yakta lai temulung mesüi akûm. Lai tangar tebur ka meim. Lai nüktapangta senzü aser tatem nung lai Hosea toktsü. Idangji parnoki la alar asütsü ayok. Iba sullen Tsüngremi Hosea nem tesüingmangtsü ozüing ka agütsü: "Oang aser la meyipa alizükang." Lai kanga Hosea mejungi yirutsü. Tsüngremi kecha jenjang masüingdangi Gomer alizüker kidangi anir arutsü Hosea dang ashi.

Tsüngremer osangji tejangja: Kodang asenoki Pa sentokdir aser tangalen ka temulung agütsüdir, nüktapangdatsür kati ashioktsüba agi yirutsüba ama asenoki sentokba jagi kasaji yirutsür. Tsüngremi asenok asoshi asenoki Pa sentoktsübaji angatettsü makok. Asenoki Tsüngrem magizükaka aser tashi mangaka Pai odang meim. Ibai asadangtsü tasakba. Au Tsüngrem temeimji asenok temeim dang nungi balaka. Pai asenok malizüktet tashi Pa temeimi asenok temenen taroktiba tashi bushia alur. Pa temeimji tasü mait masü. Kodang asenoki Pa nung jena odir, Pai maneni asenok bushir. Koda msadangtetba temeim Pai asenok dang sayu.

China nung Khristantemi N Korea nungi ajenba Khristantem yarir

January 19, 2021: Alima nung Khristantem alitsü linük tamajungtibaji North Korea lir, ajisüaka North Korea nung Khristan nütsüing meyrjang aika lir; North Korea nung Khristan aikati pei tamangba yimsü mimshia alir aser karibo linük toktsür ajener.

North Korea nungi China linüki jena aruba Khristantem meyrjang aika Open Doors secret fieldworkers-i underground networks ajanga yarir.

Northeast China nung Open Doors-i North Korea nunger Khristantem jenokdaksütsü atema ki anepalutsür. China nung secret networks ajanga parnoki North Korea nungi jena aruba Khristan 90,000 dak tema nem chiyungtsü dang masü saka tanela chiyungtsü-a agütsür.

Missions Box-i ashiba agi, Open Doors workers nungi Peter-i kanga bendanga agüja North Korea nungi jena aruba Khristantem yarir; pai Khrista atema asütsü-a metsübur aser alima nung Khristan aikati pa ajungshir aser pa atema sarasademtsür.

Peter-i ashiba agi, asükwa aonung ka pai North Korea nunger Khristan ka ajurutsü atema jembitep saka police-i North Korea nungbaji puer liasü

aser North Korea agents-ia pa dang asüingdangyar liasü ta pai osang angaziük.


Peter-isa, "Ni ghonda asem tashi pa den jembitsü merang. Anepdang 4:00 meta pa meyong phone nungi call arudang ni agizük, saka tangar kati ang jemb. Nisungba jagi kü dang, 'na shiba?' ta asüingdangba mapang nung ang ni melung melemteti akûm. Idangyongjisa ni kü phone züksaa aser kilentzü aodak indok," ta metetdaksü.

Paisa ashiba agi, "Ano mesangwajungi ni aonung piyong mekongseta kazü aser ni yimti ilonga toktsür ajen. Tesülen paji (North Korea Khristan) police-i puogo aser North Korea nungi agent temi asüingdangyaogo, ta ni osang angazük."

Peter-i North Korea nungi jena aruba Khristantem atema takûm bendanga agüja inyaker. Pai chiyungtsü asütsüba dang masü saka tanela chiyungtsü agütsür, aser parnok dang kenübo North Korea-i meyipa oa underground Arogo tashi itshidaksütsü atema ajungshir.

North Korea linüki Khristan yimsü ya linük security atema majung, ta züingshir aser Khristantem labor camp nung ayur, reshikangshir mesüra tepseta indoker.


OLONG PAITEP # 5699



TIPIEN		LANGTSÜNGLEN	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	- (4)
16. Tzü shiruru ka	- (4)	jatepba	- (4)

OLONG PAITEP # 5698 TELANGZÜBA

TIPIEN :	LANGTSÜNGLEN :
1. Lemsä, 3. Osang, 5. Mezüng,	1. Lamen, 2. Sangken, 3. Omen,
6. Agi, 7. Süra, 8. Tebutem,	4. Asüküm, 7. Sendong, 8. Tejang,
9. Amen, 12. Odi, 13. Asayar,	10. Tanga, 11. Tazü.
14. Angsü, 15. Agima.	

Agüja aliba noksa nung meputepi
aliba 7 bushiang

TANÜBO NAI LANGZÜANG

Q. Koba Union Ministry-i National Faceless Penalty Centre amenoktsü?

1. Ministry of Defence
2. Ministry of Finance
3. Ministry of Commerce & Industry
4. Ministry of MSME

===== (Taruba adok nung onoki langzüsü)

YASHI ADOK TELANGZÜBA : India

Happy Birthday

"NOKDI TAJUNG ARISHI KÜM TEROK BUBA TASHI
TSÜNGREMI MOATSÜ NUNG PELATEPA PA TENÜNG
SANGA AMONGER, MANENI TARUTSÜ NUNG ARISHI
ASER TAKÜM TEMJENA MOAJANG TA
SARASADEMTSÜR"

- TEMIEM OJA, OBA, OYA ASER OTZÜ OBOU
NUNGERTEM.



NAI-A YA METETTER MA?

JANUARY 20 NÜ ATALOKBA KAR:

- 1045 - Pope Sylvester III ama Giovanni di Sabina shim.
1320 - Duke Wladyslaw Lokietek ya Poland indang Chuba aküm.
1667 - Treaty of Andrussovo ajanga Poland aser Russia tsüngda küm 13
rara aruba anentsü.
1809 - William Maclure-i 1buba US geology kaket adok.
1920 - American Civil Liberties Union ngutet.
1947 - CIA indang deputy director ama Brigadier General Edwin K Wright,
USA shim.
1964 - "Meet The Beatles" kensep US nung saya.
1965 - The Byrds "Mr Tambourine Man" ken record asü.
1978 - Columbia Pictures-i movie rights atema "Annie" nem dollar million
9.5 agütsü.
1990 - 47buba Golden Globes: "Born on the Fourth of July" atema Tom
Cruise-i award angü.
1993 - US Tir 42buba ama Bill Clinton shim.
1994 - Sundance Film Festival nung British comedy "Four Weddings and a
Funeral" saya.

SUDOKU # 5740

TELANGZUBA # 5739

	5	2		6			8		7	4	8	9	1	5	2	6	3
				8	7	3		1	2								
3		8	1		2			9	3	5	9	2	7	6	4	8	1
				7	9	5	2		6	8	7	5	9	4	1	3	2
5		7					9		4	9	3	1	2	8	7	5	6
8		9		4	1	7	5		5	1	2	6	3	7	8	4	9
	6		4		7	8	9		1	2	4	3	5	9	6	7	8
7	8	4		3				5	8	3	5	7	6	1	9	2	4
		1		2		6			9	7	6	8	4	2	3	1	5

OJANG LUTEP # 5287

TONSENGTEM	:								
LIJEA	:								
EYANGMLUI	:								
AKJONGT	:								
NGNU	:								
RITAEPÄ	:								
AKBINYA	:								
NGAJAA	:								
ARMAPEN	:								
TSÜRAKSAR	:								

OJANG LUTEP TELANGZÜBA # 5286

TAKÜM NUNG TETI DANGBO TIA TAJUNG MESÜRA TIMTEMA
DANGBO MALIR

TAN HOPTA ATEMA - KOMA SÜLA ?

Q. Asenok kidang kilir ayuba yimya ya anen nunga koma süla ?

Olong 20 shi nung January 22, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsüsü.

Ni aibelena mali, PM modi metsübur: Rahul Gandhi



New Delhi, Aenjeti/January 19 (Agencies): Taoba Congress tir Rahul Gandhi-i Mongolbarnü ashiba agi, pai, Ato Kilonser Narendra Modi tsübua mali, kechiyong pai kecha aibelena mali aser pa pusemer shinga meliaka pai kijai asüyonga raratsü.

Party headquarters nung aluyim ozüing asem indang booklet; "Kheti Ka Khoon sayaba sülen osangbenertem den sensaksemba mapang pai iba ilen lemsatop.

Rahul Gandhi-i, "ni Modi mesera shinga metsübur. Ni aibelena mali aser parnoki kü dak mekongshitetsü. Parnok kü dak khatetsü akok. Ni linük meimer nisung ka aser ni kü linük kümzüka ayutsü. Ni kü kija

dang süaka nokdangtsü kechiyong iba ya kü tamangba lir. India tanaben nüjiso atema raradar," ta ashi.

BJP tekolkba J.P. Nadda-i, pai aluyimertem minponger ta ashiba dak sendakba nung telangzüba agütsüdang pai iba olen lemsatop.

Paisa, UPA sorkar mapanga Congress-i Bhatta Parsaul nung aluyimertem den nokdakogo. "Iba mapang BJP mesera Nadda nokdaka maliasü," ta pai ashi.

Centre aija Rahul Gandhi-i, aluyimba ozüing asem ya India nung aluyimba tsütsü inyakyim raksatsütsü atema lir, ta ashi.

Paisa, "Mepetmesü tulu adokogo aser ni aluyimertem indang jembirba dang masü,

kechiyong tatalokba iba kija ya masü. Linük dak tamang akaba lanurtemi kanga junga angaa atatsüla," ta ashi.

"Airports, telecom, power, retail, board balala dak sendakba nung asenoki tang ajangshia aruba ya monopolies nung terenlok lir," ta pai ashi.

Rahul-i, linük ya nisung ana asemka meyong kümogo, kechiyong parnok media aser Ato Kilonseri pusemer.

"Tang tatemsa aluyimba dak mekongshi aliba ajia samaa odar," ta pai ashi.

Rahul-i ashiba agi, inyakyim ajak nisung ka ana meyong akümtsü aser aluyimertem parnok tangutsü tim taa mangutsü aser teyongtsü nung alirtem kanga timtemtsü.

India-i linük trok nem coronavirus vaccines agütsütsü

New Delhi, Aenjeti/January 19 (Agencies):India-i grant assistance kübok Bodhbarnü nungi tenzüka Bhutan, Maldives, Bangladesh, Nepal, Myanmar aser Seychelles nem Covid-19 vaccines agütsütsü ta Mongolbarnü metetdaksüogo.

Ministry of External Affairs-i ashiba agi, India-i partner linüktem nem taruba hopta aser itatem nung shilem balala lemsar linüktem nüngdak apir Covid-19 vaccines agütsü tenzüksü.

Kasa mapang nung avaccine supply asütsü atema Sri Lanka, Afghanistan aser Mauritius nungi temelaba atadar.

MEA-i ashiba agi, India-i kidanger linük aser tembar linüktem nungi India nung yangluba vaccines tem alizüksü atema mepeshiba aika agizükogo.

"Item temepishiba nem telangzüba agütsüba ama aser India-i Covid wara den raratsü atema India nung vaccine atokdaksüba aser delivery tashi amshia teyari agütsütsü bendanga agütsür aliba atalokja Bhutan, Maldives, Bangladesh, Nepal, Myanmar aser Seychelles nem January 20 nungi tenzüka vaccine agütsütsü," ta MEA-i ashi.

"Sri Lanka, Afghanistan aser Mauritius dak sendakba nung, onok tang tenüngdakba maparen tem tembanga inyaksü atadar," ta kasa sangdong ajanga metetdaksü.

India nung vaccine agütsüba sentong tenzükogo aser iba kübok Covishield aser Covaxin vaccine linük nung yakbang nung inyaktertem nem agüja arudar.

Kasa mapang nung Oxford-AstraZeneca indang Covishield vaccine ya Serum Institute nung yanglur aser Covaxin vaccine ya Bharat Biotech-i yangludat.



Covid-19 tashidak poktetba ajanga taoba taoba küm March ita 19 nü nungi school shibanga ayuba sülen Kanyakumari nung school lapoktsü temelaba agütsüogo. Noksa nung class 10 aser 12 kaketshirtem thermal screening agiba angur.

Covid-19: India nung nisung 10,064 dak tashidak potet

New Delhi, Aenjeti/January 19 (Agencies): India nung ita tenet tsüingda taoba ghonda 24 nung nisung ishitiba dak coronavirus tashidak poteta liasü. Taoba ghonda 24 tsüingda India nung nisung 10,064 tashidak potetba sülen tashidak agi atonger nisung 1,05,81,837 jungogo aser kasa mapang nung tashidak aneper 1,02,28,753 jungogo, ta Union health ministry sangdong ka ajanga Mongolbarnü metetdaksü.

Linük nung nisung 137 asüba sülen tashidak agi asür 1,52,556 jungogo. Ita ti tsüingdang taoba ghonda 24 nung nisung ishitiba asü, ta kasa sangdong ajanga metetdaksü.

Tang tashi nung national recovery rate 96.66 per cent aser fatality rate 1.44 per cent nung lir. Maneni tashidak agi tonger tang temang anepalua alir 2,00,528 lir, koba total caseload shilem 1.90 asütsü.

India nung Covid-19 tashidak menar lakh 20 August 7 nü ajang iba sülen August 23 nü lakh 30, September 5 nü lakh 40

aser September 16 nü lakh 50 ajung. Maneni September 28 nü lakh 60, October 11 nü lakh 70, October 29 lakh 80, November 20 nü lakh 90 aser December 19 nü crore ka adena atu.

Indian Council of Medical Research-i ashiba agi, January 18 nü tashi nung sample 18,78,02,827 tendangogo aser item sample tem rongnung Hombarnü 7,09,791 tendanga liasü.

Asür 137 rongnung Maharashtra nungi 35, Kerala nungi 17, West Bengal nungi 10, Karnataka nungi 9, Delhi nungi 8 aser Tamil Nadu nungia 8 densema lir.

Tang tashi nung linük nung tashidak agi asür 1,52,556 lir aser item rongnung Maharashtra nungi 50,473, Tamil Nadu nungi 12,272, Karnataka nungi 12,175, Delhi nungi 10,754, West Bengal nungi 10,063, Uttar Pradesh nungi 8,580, Andhra Prade nungi 7,141 aser Punjab nungi 5,509 lir.

Health ministry-i ashiba agi asür shilem 70 dak tema tanga tashidak keta aliba ajanga süogo.



Kullu district nung Himachal Pradesh Panchayat election tanabuba shilem nung vote agütsüba sülen yimdaklirtem Beas ayong adena süngzü apu nung aoba noksa nung angur.

Uttarakhand nungi aluyimer 3,000 parnok indang tractors anir Delhi-i aotsü

New Delhi, Aenjeti/January 19 (Agencies): Bharatiya Kisan Union nung züngoksema aliba Uttarakhand indang Udham Singh Nagar nungi aluyimer 3,000 shi parnok indang tractor anir Delhi arrtsü nung Gazipur tesemi January 23 nü aotsü. Parnok Republic Day nü linük yimtiba Delhi nung kisan tractor parade nung shilem agütsü atema aotsü, ta union-i Mongolbarnü metetdaksü.

"Republic day nü tractor parade nung shilem agütsü atema Gazipur arrtsü-i pei tractor bener aluyimer 3,000 aotsü atema onoki telemtetba agiogo. Züngsem 13 agi kümteba committee kati district ajak nung aluyimertem den tongtepratepa iba parade nung shilem agütsü atema mepeshitsü," ta Bharatiya Kisan Union, Uttarakhand tir Karam Singh-i ashi.

Aluyimba lokti tentetemi mepetmesü aketba aluyimba ozü asem anema longkak aita arudar aser parnoki sorkar dang iba ozüing agütsü akhangtsü atema January 26 nü tractor parade ka ayongzüka agütsü sentong yanglua lir. US Nagar district nungi aluyimertem aika

Gazipur nung tang longkak aita alirtem den denogo aser iba longkak aitba sentong nung shilem agütsü atema mongzüka lir.

Hombarnü Bazpur nung tractor rally atema sentong yanglutsü asoshi aluyimertem senden ka menogo. Senden nunnga committee-i iba sentong nung aluyimertem nem shilem agidaksütsü atema district ajak sema aotsü telemtetba agi.

Bazpur nungi lenir Ajit Pratap Randhawa-i, "aluyimertem Gazipur arrtsü-i January 23 nü apusoa aotsü, ajita asünungdang tractor rally nung shilem agütsü atema mapang shidak nung oa atongtsü. Onoki district nung aluyimertem den sensaksemdar," ta ashi.

Delhi police-i, linük yimtiba nung Republic Day amungba mapang timtem kecha matoktsü atema aluyimertem nem tenokdangba agütsütsü asüngdangba dak sendakba nung Hombarnü Suprem court-i kecha tetuyuba magütsü.

SC-i ashiba agi, parnok tashi amshitsü atema tetuyuba ka agütsü kecha nungdak madoker.

Tanü Joe Biden aser Kamala Harris tenangzüktep agitsü



Washington, Aenjeti/January 19 (Agencies): United States of America nung Tir aser Tatong Tir tasen angutsü mapang tongogo. Joe Biden ya United States indang Tir 46 buba ama tenangzüktep agitsü aser kasa mapang India nungi jakzüka aoba yimten yimsüsür Kamala Harris ya linük indang Tatong Tir 49 buba akumtsü. Kamala Harris ya USA indang Vice President tetsür mezüngbuba akumtsü.

US Tir 45 buba, Donald Trump busemer temi US Capitol telungi ia rongrong agütsür tensa mejungi aliba mapang ka nung Inauguration Day 2021 ya ajurur. January 6 nü azüdokshiba nung nisung pongu tashi asüba temolungjang nung yur Inauguration Day sentong ya

tilaba kuma agitsü atema security tsütsü mera balala agia lir.

Entertainer Keke Palmer menden sür agiba iba sentong ya India nunga nüburtemi January 20 aonung 10:00 ako nung reprangtetsü. Iba sentong ya national anthem tena tenzüksü. Inauguration mezüngbuba live stream asütsü aliba nung USA indang First Lady, Dr Jill Biden-i nüburtem den jembitsü.

Anügdang anjong meshi masüdag Kamala ya Vice President by Supreme Court Justice Sonia Sotomayor-i tenangzüktep agitsütsü. Iba sülen Biden ya Tir ama Chief Justice John Roberts ajanga tenangzüktep agitsü.

Iba tenangzüktep agiba sülen yimjung nung tashi

melenoktsüba temaitsü sayua Biden aser Kamala nati transitional 'Pass in Review' semdangtsü.

Nüburtemi Joe Biden indang Presidential Inauguration ya United States nung tongtipang TV network tem nung reprangtetsü. Item rongnung CNN, MSNBC, ABC, CBS, PBS aser NBC dena lir.

Iba sentong indang livestream ya Amazon Prime Video, Microsoft Bing, Fox nungi NewsNOW, AT&T U-verse (Channel 212/1212 in SD/HD) aser AT&T DIRECTV (Channel 201) nunga reprangtetsü.

Iba sentong ya Biden Inaugural Committee indang social media channel tem mesüra bideninaugural.org/watch/ nunga reprangtsü akok.

India-i Bangladesh nem Covishield doses million 2 agütsütsü

Dhaka, Aenjeti/January 19 (Agencies): Sempet ama India-i AstraZeneca Covid-19 mozü doses million ana agütsütsü, ta Bangladesh-i Mongulbarnü sangdong.

"Sempet ama January 20 nü India-i Bangladesh nem Oxford-Astrazenca Covid-19 vaccines (Covishield) doses lakh 20 agütsütsü," ta Bangladesh indang foreign ministry ajanga par Facebook page nung lemsatep.

"India nunger indang tayimtsü balaka nung iba mozü ya bener asüng Dhaka nung aliba Hazrat Shahjalal International Airport nung arua anentsü," ta parnoki ashi.

Bangladesh nung tang yimsü tesüdak Awami League party-ia Twitter nung, Serum Institute of India den sorkari mozü doses million 30 atema contract renema aliba den bendenloksema ano Bangladesh AstraZeneca mozü doses million ana angytsü lir, ta Twitter nung lemsatep.

"Sempet ama India sorkari #Bangladesh nem #Oxford #Astrazeneca #COVID19

#vaccines doses million 2 agütsütsü. Ibai

@SerumInstIndia nungi #CoronaVaccines million 30 alitsü aliba nungi talila lir. Sempet ama agütsüba mozü ya January 20 nung tonga arutsü amanger: DGHS, Ministry of #Health," ta party ajanga Twitter nung metetdaksü.

Iba atema India nunger ketdangsürtem nungi osang kecha agüja mali.

Sorkari India nunger COVID-19 mozü yangluba company ana - Serum Institute aser Bharat Biotech - den virtual meeting ka Hombarnü mena bendang linük nem iba mozü agütsütsü atema asadangtepa liasü.

Hombarnüsa Ato Kilonser Narendra Modi-ia par sorkari kidanger linüktem yaritsü sentong aliba athishia Twitter nung metetdaksü. Alima nung vaccination sentong tulutiba tenzükba atema India nem

tenüngsang agüja Sri Lanka Tir Gotabaya Rajapaksa aser Maldives Tir Ibrahim Solih nati züluba nung langzüdang Modi-i iba onük ya amsema ashi.

University-i Security Forces yokba anema Philippine nung longkak ait

Manila, Aenjeti/January 19 (Agencies): Philippine nung sorkari linük nung university tulutiba security forces nem meita toktsüba atema kaketshir aser activist temi Mongulbarnü longkak aita liasü. Ketdangsürtemi iba tesem ya communist tem anitetba tesem ka ta aitsüba sülen sorkari iba mera ya agi.

Tir Rodrigo Duterte-i aniba sorkari Maoist-i anir sorkar anema nokdakba samatsütsü asoshi jenjang aika agidar. Maoist-i anir sorkar anema nokdakba ya linük nung mangatettep talangtiba lir aser nisung 40,000 dak tema tepsetogo.

Ajisüaka United Nations-i sangdong ka ajanga, nüburtem aser telok balala communists mesüra kiralongrartem ama züngshiba ajanga iba linük nung azütokshi tali adoker, ta tekümdangtsü metetdaksüogo.

Hombarnü sorkari parnok telemtetba metetdaksüba nung jongdak mapang mesüra ozüng raksartem arishiba mapang dak alaka 1989 küm temelaba makai University of Philippines (UP) indang campus 17-i sepai aser police tem maitsü atema tenokdangba agütsür aliba aginba sangdongogo.

"Iba ajanga tashiyim agi azüokba, nüngdak makaba nung merenshiba aser activist, lanur aser kaketshirtem parnoki kuli makai communists aser kiralongrartem kümdaksüba kuli agütsür aser iba ajanga campus tem nung sorkar

anemertem aitdaksütsü," ta left-wing labour group human rights secretary Eleanor de Guzman-i longkak aiteritem dang ashi.

1989 küm lemtetba agintsü atema telemtetba agiba aginba kuli agüja Defence Secretary Delfin Lorenzana-i, küm 112 tain university ya sorkar anema nokdaksüpurtem anitetba tesem ka kümogo, ta ashi.

UP kaketshirtem aika communist party indang armed wing nung desema aliba jangjaogo. Parnok rongnung kar sepaitemi meita aoba mapang tepsetogo mesera puogo, ta defence ministry-i kuli kecha magütsüi university tir dangi züluba shiti nung shia lir.

Academics aser yimden yimsüsürtemia iba telemtetba aginba aitsüogo aser ashiba agi, iba ajanga academic nüjiso agintsür aser masüba nung nüburtem aitsütsü atema lenmang sadema lapoktsür.

University tir Danilo Concepcion-i defence ministry dang iba telemtetba asadangshitsü mepeshia asüngdangogo aser kasa mapang nung opposition lenir Vice President Maria Leonor Robredo-ia, sorkar aitsürtem ajem ajema kümdaksütsü atema iba jenjang agi, ta ashi.

2016 küm sorkar kümtetba sülen Duterte-i aniba sorkar aser communist rebels na tsüngda yimjung asoshi sensaksem aiben tamakok anguba ajangshia arudar.

Pakistan nung Sinopharm Covid-19 vaccine amshitsü

Islamabad, Aenjeti/January 19 (Agencies): Drug Regulatory Authority of Pakistan (DRAP) ajanga Hombarnü jongkdak mapang China nung yangluba Sinopharm indang Covid-19 vaccine amshitsü atema temelaba agütsüogo. Linük nung tang agi vaccine tanabuba amshitsü temelaba agütsüogo, ta Dawn sangdong ka ajanga metetdaksü.

Hokolbarnü DRAP-i Pakistan nung jongdak mapang Oxford University-AstraZeneca Covid-19 vaccine amshitsü atema temelaba agütsüogo.

"January 18, 2021 nü Registration Board of Drap senden amenba mapang ano China National Pharmaceutical Group (Sinopharm)-i yangluba mozü ka jongdak mapang amshitsü atema temelaba agütsüogo," ta DRAP otongdar kati ashi.

Oxford aser Sinopharm vaccine anaprongla jenjang aser teküzmükba asadangogo aser temelaba agütsüogo," ta kasa sangdong ajanga metetdaksü.

Temelaba agütsür aliba ya teküzmükba, jenjang aser efficacy temolungdang yur mapang shia asadangtsü, ta parnokisa metetdaksü.

Sinopharm ya Beijing Institute of Biological Products nung yanglur. Company yagi iba

vaccine ajanga shilem 79.3 mapa inyaker ta shiogo, ta Dwan sangdong ajanga metetdaksü.

Kasa mapang nung China-i taoba ita iba mozü nüburtem nem agütütsü temelaba agütsüogo. Iba mozü ya normal refrigeration temperature nunga rizünga yutettsü.

Maneni kasa mozü ya UAE aser Bahrain nunga amshitsü atema temelaba agütsüogo aser Morocco nunga amshitsü renema lir, ta kasa sangdong ajanga metetdaksü.

Iba ya inactive vaccine ka lir aser iba tetezü iba mesen ya lab nung indaktsü aser iba sülen tepset. Iba sülen mesen ya immune response adokdaksütsü atema temang nung inoktsür.

Data tali sangdongba sülenang iba mozüi koma mapa inyaker iba indang tali jangjatsü, ta Dawn sangdong ajangsa metetdaksü.

December 30 nü Federal Minister for Planning and Development, Asad Umar lenisüba kübok Covid-19 vaccine alizüktsü atema special cabinet committee senden ka amenba mapang Sinopharm ket nungi vaccine dose million 1.1 alizüktsü telemtetba agi. Parnokisa vaccine ya yakbang nung inyaker 500,000 nem agütsütsü ta sangdonga liasü.

Minister aser Advisor temi Linük Wako salatsü

Dimapur, Aenjeti/January 19, 2021 (TYO): January 26, 2021 nü aruya aliba Republic Day anogomung sentong nung tsünglanglen agüja aliba Minister aser Advisor temi Linük Wako salatsü aser Rashtriya salute agütsütsü. Item Minister aser Advisor tenüng yamai alitsü:-

1. Sharingain Longkumer, Speaker, Nagaland Legislative Assembly - Dimapur

2. G. Kaito Aye, Minister, Agriculture- Wokha

3. Neiba Kronu, Minister,Planning, Land Revenue & Parliamentary Affairs-Phek

4. P. Paiwang Konyak, Minister, TPT, Land Resources - Zunheboto

5. Jacob Zhimomi, Minister, PHE -Tuensang

6. Metsubo Jamir, Minister, Rural Development - Longleng

7. Tongpang Ozukum, Minister, Housing, Mechanical - Mon

8. Temjen Imna Along, Minister, HE, TA - Mokokchung

9. Namri Nchang, Advisor, Water Resources - Peren

10. H. Haying, Advisor, Prisons, P & S - Noklak

11. Medo Yhokha, Advisor, Technical Education & Election - Kiphire

CHC Bhandari nung Covid-19 Vaccination drive agiogo

Bhandari, Aenjeti/January 19, 2021 (TYO): Mongolbarnü, Bhandari Sub-division kübok COVID-19 frontline workers atema Community Health Centre (CHC) Bhandari nung kanga dang yongya ataba COVID-19 Vaccination drive sentong agiogo, ta sangdong ka ajanga metetdaksü.

Medical officer, Dr.Yanpothung Kithan aser Dr. Chumdemo Ngullie nati iba Vaccination drive sentong ketdangsüa agi.

Iba drive mezüing shilem nung tajangzük angutsüpur nisung 67 nem Covid19 mozü agütsüogo aser iba mozü agirtem ghonda tesadangka atema observation room nung anisüngzükdaksü, kong Adverse Events Following Immunization (AEFI) atema incharge Dr.Chonbenthung Ezung, MO Yimpang-i parnok mita/repranga liasü.

Dr. Lipokrenla MO, Ayush-i iba drive achaayanga agiba mapang, ajak kümzüka yutsütsü asoshi, lai mozü agir alir frontline workers tem dang maneni COVID-19 SOP tetuyuba nung anidaksü asoshi mepishi.

Associate Pastor, 7th NAP, Wilson Lotha-i sarasademtsür sülen, iba Vaccination drive sentong tenzüik.

India nung Vivo Y20G Smartphone saya

New Delhi, Aenjeti/January 19, 2021 (Agencies): Vivo-i parnok indang Y-series lineup nungi Vivo Y20G smartphone sayaogo. Phone tasenba design ya vanilla Vivo Y20 ama alitsü, saka Qualcomm Snapdragon 460 SoC melen MediaTek Helio G80 processor keta aliba angutsü.

Vivo Y20G tesülen triple camera aser tejaklen waterdrop-style notch keta lir, kong selfie camera inoka yanglutsüogo. China indang smartphone company-i ashiba agi, sorkar indang Make in India mapatong pusema Vivo Y20G ya Vivo indang Greater Noida facility nung yanglu.

Iba phone ya variant ka - 6GB + 128GB nungang angutsü, koba sen 14,990 alitsü. Ano külen, Vivo Y20G ya Obsidian Black aser Purist Blue sentsü nung angutsü. Customer temi iba smartphone ya Vivo offline aser online channel tem ajanga alitettsü.

Kasa mapang, smartphone ya Amazon, Flipkart, Paytm, Tatacliq aser tanga offline store tem ajanga angutsü. Vivo-i ashiba agi, HDFC Bank credit aser debit card amshia alirtem nem regular aser EMI transactions nung shilem 10 off agütsütsü. EMI option tem Bajaj Finserv cards, ICICI Bank aser tanga ajanga angutsü.

Tening nung health worker

tem Covid-19 mozü agiogo

Tening, Aenjeti/January 19, 2021 (TYO): Hombarnü (18.01.2021) Tening nung health worker 41 nem COVID-19 mozü agütsüogo. Covid-19 vaccine agir sülen, iba mozü ajanga parnok temang nung timtem kecha madok.

Mongolbarnü (19.01.2021) Azailong aser Mbaulwa Primary Health Centre kübok health workers nem iba COVID-19 mozü agütsüogo, ta sangdong ajanga metetdaksü.

Changtongya Baptist Church KANGA PELAR



Ozü Arogo member tajung Mr. T. Temjen Longkümer Kibubar mapa asoshi bendanga ayutsü ABAM dang asüngdangba ama, January 17, 2021 nung pa Ordain sütsüba asoshi kanga pelaba metetdaksür. Tang nungi pa dang Rev. T. Temjen Longkümer ta ajatsü. Iba maparen inyaka arudang ABAM Ordination Council züngsementemia maparen ajak tajungtiba nung yaritepa aruba asoshi kanga pelar:

Rev. Dr. A Tali Ao, Chairman, CTC
Rev. Imly Jamir, Asso. Pastor, DABA
Rev. Niken Pastor, Mongchen Baptist Arogo
Rev. Temjenlemzung Pastor, Chuchuyimlang Town Baptist Arogo
Rev. Dr. T. Lima Ozukum, Diphupar Ao Baptist Arogo

Kibubar mapa asoshi bendanga ayur Rev. T. Temjen Longkümer aser par kibongi tarutsü nung Tsüngremer wadang tuluba inyaktettsü asoshi temjena moajang ta arogoi sarasademtsür.

Sd/-
Rev. I. Wati Jamir
Pastor, CBC

Assam Rifles-i mozü shibelener ka apu



Dimapur, Aenjeti/January 19, 2021 (TYO): Hokolbarnü (15.01.2021), Police nungi teshimtet nübu den Assam Rifles indang Dimapur Battalion longjemer Burma Camp telungtet nung General Area mita aoba mapang, temesepba mozü shibelener ka apu.

Osang tejangja ka angazükba nung ajemdaker Dimapur nung agütsüogo, ta Assam Rifles aser Police team sangdong ka ajanga kati iba tesem mita ao aset pa ket nungi SP Capsule 2700, Nitrosum Tablet 400 aser sen lakh 1 ngutet.

Pua alisang ya Nibeto Swu'er jabaso Nilo Swu ta jangjaogo.

Iba maparen dak sendakba nung maneni bushisüngdangtsü atema, pua alisang aser pa ket nungi ngutetba mozü aser sen ajak East Police Station Dimapur nung agütsüogo, ta sangdong ka ajanga metetdaksü.

50th Wedding Anniversary 20.01.1971 - 20.01.2021



Mr. Imkumnuken (84) & Mrs. Lanutula (77) Merangkong

"Kibuba tsübuba jagi arishi atsülanger, saka tamajunger arishi tatsüba akümer". Apijemtsü Shin 10:27.

Shi aser tanüla ajak nung ozü akümdong temeim tsürapur ana kibong kümer küm 50 tashi taküm arishi moatsüba asoshi teyanglur Tsüngrem tenüng asanger. Tsüngremi tsürapur taküm maneni wazüka dokjangma ta ozü sarasadem.

~ Temeim Chirnurtem aser Semchirtem.

MULUNGZEN O

Sayutsüngir 7:1 - "Tenüng tajungji senti mozü dang tajungba"



ASO
16.05.1933

ASÜ
12.01.2021

Asür C. Nokentemla Langu (Lirmen)
W/o. S. Teka Longchar (Lirmen)

Onoki teti meima aliba Ojala Asür C. Nokentemla Langu (Lirmen) la Tsüngrem metetba, taremsük, ajemalu, ochishir, tagütsünü aser tetemjen tetsü ka onoki meimlai aliba mapang ka ajungbena la iba akümüli wadang tembanger onok mulungzürep tia aser mangyim jashi nung alidang tentet balala, kija kibong, kiyongertem, kinungertem, sensosanger, anükapang, medemertem aser temulunger shirnokisa shisatsü, nübo, rongsen aser sarasadem agi nungita yariogo, nenok ajak den onoki pelaba lemsateper.

Nenok kija shia tenüng teta ozüi pelar ta meshitetba atema sasa bilemer, saka Tsüngremi nenok mapa tajung moajang ta onoki sarasademtsür.

~ Temeim Kinungbo, Chirnur, Anükapang, Kinungertem aser Semchirtem.

Nagaland team-i wicket 8 agi Manipur kokogo



Dimapur, Aenjeti/January 19, 2021 (TYO): Mongolbarnü, Syed Mushtaq Ali T20 Trophy (2020-21) asayamung Palate Group - league stage indang final asaya nung, Nagaland-i Manipur madak wicket 8 agi takok nguogo.

Manipur team-i toss koka batting asütsü shim aser over 20 nung parnoki run 129 yanglur wicket 8 out süadok. Langlongyamba-i run 50* aser

Nitesh-i run 37 yanglu.

Nagaland nungi Stuart Binny-i wicket 3 aser Nagaho, Hokaito den Hem nungeri wicket ka ka out sütsü.

Tanabuba innings nung Nagaland team-i over 17.1 nung run 131 yanglu aser wicket 2 out süadok. Chetan Bist-i run 60 aser SS Mundhe-i run 36* yanglu.

Manipur nungi Denin aser Ajay Singh napronglai wicket ka ka agi.

Palate Group - League stage nung Northeast state rongnung asaya ajak takok anguba state ji Nagaland team alitsü.

Ajisüaka, Nagaland team-i Chandigarh den mezüing asayadang tzüinglu agi asaya nokdangba ajanga telok ana tsüingda point lemsatsüogo, koba Bihar team, shirnoki asaya ajak koka lir, Plate Group nungi taruba round atema par telok qualify süogo.

1buba G.Rio Memorial: Mokokchung aser Dimapur nati takok angu

Dimapur, Aenjeti/January 19, 2021 (TYO): Mongolbarnü, 1buba Late G. Rio Memorial U-19 (Boys) Inter-District Cricket asayamung nung Mokokchung-i run 47 agi Kohima kokogo.

Mokokchung-i toss koka batting asütsü shim. Over 25 nung Mokokchung team-i run 169 yanglur wicket 4 tukadok. Team nungi Nripen Rai-i run 86* aser Mughavi-i run 28 yanglu.

Kohima nungi Samuel Zaputou-i wicket 2 aser Zidu Pohen-i wicket 1 agi.

Tanabuba innings nung Kohima-i over 25 nung run 122 dang yanglutet aser wicket 5 tashi out süadok. Kohima team

Captain, Samuel Zaputou-i run 35* aser Micheal Zaputou-i run 18 yanglu. Mkg nungi Odilemba o Neizekho nati wicket anana aser Tamsulong-i wicket 1 agi.

Kasa asayamung tanabuba asaya nung, Dimapur-i wicket 7 agi Tuensang kokogo.

Tuensang-i toss koka batting asü, kong over 22 nung Tuensang-i run 126 yanglu aser wicket 6 out asü. Jongpongmar Ao (Captain)-i run 34* aser Rajesh-i run 30 yanglu.

Dimapur team nungi Raja-i wicket 3 aser Rahul-i wicket 1 agi.

Iba asaya mapang tzüinglu aruba ajanga, Tuensang pur Innings - over 25 nungi over 22 tashi ajemtsü aser asaya

tenzükshiba sülen, DLS Method nung anidak, koba over 22 nung Dimapur team-i run 137 yanglutsüsa kümaddock.

Ajisüaka, tanabuba innings nung Dimapur team-i over 12.2 nung run 137 tongtet aser wicket 3 tashi out asü. Dimapur nungi Tohuka Zhimo (Captain)-i run 56, Yugandhar (wk)-i run 32 aser Mhalevor Dzeyie-i run 19* yanglu.

Tuensang nungi Baharul, Rajesh aser Wangto nungeri wicket ka ka agi.

*** Tanü asaya yamai alitsü:**

1st Match (7:30 A.M) : MOKOKCHUNG VS TUENSANG

2nd Match (11:45 A.M) : DIMAPUR VS KOHIMA

India vs Australia: India-i 2-1 agi Test asayamung kokogo



New Delhi, Aenjeti/January 19, 2021 (Agencies): Brisbane nung India team-i Australia madak test series asaya pezü nungi 2-1 koka otsü yangluogo. 1988 küm nungi Gabba Test asayamung nung Australia team khen danga tamakok mengudangi arur taküm iba asayamung nung India team-i parnok tsükdaksüogo. Iba ya

masüadang, Sir Viv Richards lenisüba kübok West Indies team-i Australia pur kokdanga lir.

Tang, Ajinkya Rahane, shibai Boxing Day Test nung century yanglu, pai anir team-i Test series pezübuba aser final asayaogo aser Sir Viv Richards den pai jenjang ka ajangzüktetogo.

Mongolbarnü, Gabba nung

India team-i otsü tasen ka yanglutettsüsa asaya, kong par teloki iba Test series final - pungonübuba nung Australia madak wicket asem agi takok angu. Iba final asaya nung India-i run 328 nüngdaka liasü aser asaya atemtsü ball 18 anünga lia, parnoki iba asaya koktet.

Iba takok densema, India-i iba '4-Test series' 2-1 agi akok aser Border-Gavaskar Trophy nguogo.

India team nung asayar tasen dang süaka, parnoki iba Test series koktetba ya tesüingmangtsüka lir aser tanü parnoki iba alizüing tongtetba ya teti bilemtettsü.

Tang, India team-i Australia nung Test series asayamung atonga takok angur alitsü. 2018-19 küm India team-i series 2-1 agi takok angu aser taküm-a (2020-21) parnoki iba series 2-1 agi kokogo.

India team nem sen cr.5 talila agütsütsü: BCCI

New Delhi, Aenjeti/January 19, 2021 (Agencies): Ajinkya Rahane lenisüba kübok India Cricket team-i Australia madak pezübuba aser final Test asayamung takok anguba sülen, Mongolbarnü, BCCI-i India team nem sen cr. 5 talila agütsütsü ta sangdongogo. India team-i iba series 2-1 koka Border-Gavaskar trophy nguogo.

Gabba, Brisbane kübok iba Test series asayamung final nung, India-i run 328 yanglua Australia akok. BCCI President Sourav Ganguly aser Secretary Jay Shah nati twitter ajanga India team nem sen talila agütsütsü asoshi sangdonga liasü.

"Australia tonga orr iba ama yimya ka nung test series koktetba ya jangratemsüka lir. India cricket indang putiotsü nung iba ya teti bilemtettsü. Takoker Team atema BCCI-i sen cr.5 talila agütsütsü sangdongogo. Iba takok ya kecha den medemdangtsü

makok. Test series asayamung nung shilem agir ajaki junga asayaogo," ta twitter ajanga Ganguly-i lemsatsep.

"Team nem sen cr.5 talila agütsütsü asoshi @BCCI-i sangdongogo. India Cricket atema iba takok ya alakteta tajung kor. Asayartemi parnok dak aketba sempet aser tasa tajungtiba amshia asayaogo," ta Shah-ia lemsatsep

Twitter post tanga ka nung, Shah-isa India cricket team nem tenüingsang agütsüogo.

"T a n #BorderGavaskarTrophy nung #TeamIndia-i temulungtetba, tashi aser tejangraba tanela sayuogo. Nenoki takok tulu anguba ajanga linük ajunga a j u n g m e s o g o . @ a j i n k y a r a h a n e 8 8 @RaviShastriOfc & team-i junga asayaogo. Siraj @ R i s h a b h P a n t 1 7 @RealShubmanGill nung dang alakteta pelaba shisemer," ta Shah-i lemsatsep.

Serie A: AC Milan-i Cagliari kokogo



Sardinia, Aenjeti/January 19, 2021: Hombar aonung AC Milan aser Cagliari na tsüingda Serie A asayaba mapang, asaya tenzüker minute 7buba nung Zlatan Ibrahimovic-i penalty ka metsülöktsüba yangi angur.

Aenjeti/January 19, 2021 (Agencies): Serie A asayamung nung AC Milan-i Cagliari madak goal 2-0 agi takok angu. Iba asaya nung Milan striker Zlatan Ibrahimovic-i goal anaprongla idaktsü.

Taoba küm tatemlen iba asayamung nung Zlatan yirur sülen, pai iba asaya nung mezüing shilem agir alitsü. Iba asaya takok den AC Milan-i point asem tashi ngua table nung temaba jenjang tongtetogo.

November 22, 2020 nü AC Milan-i goal 3-1 agi Napoli akokba mapang, Ibrahimovic tepi yirua liasü aser iba timtem ajanga taoba hopta Torino den asayadang substitute ama shilem agiba dak alia mapang talangka pa masayateti aruogo, saka Hombar aonung Sardinia nung asayaba mapang Zlatan-i akhi ama kanga yakyaka asayaogo.

Iba asaya tenzüker AC Milan-i goal ka metsütsü maongka angu aser minute 7buba nung Zlatan-i aibelen

mesüi dang iba goal metsülöktsü. Asaya tanabuba half tenzüker minute 7buba nung paisha telok atema goal tanabuba idaktsü. Tan Serie A season nung asaya 7 nungi Zlatan-i goal 12 tashi idaktsü alitsü.

Ajisüaka, iba asaya mapang Milan nung Alexis Saelemaekers-i asaya den mapet yimya benshia anaben tashi atonga yellow card anguba ajanga asaya tatemlen minute 74buba nung pa asaya nungi tukudaktsü.

Tang Serie A table point nung AC Milan pur point 43 tongteta temaba jenjang nung lir, koba tetokteper telok Inter Milan den point asem aser point 10 agi taoba asayamung takok angur telok Juventus, shirnok jenjang pungobuba nung lir, parnok tejakdang kümogo.

Kasa mapang, Cagliari pur jenjang 17buba nung lir, koba point kati dang relegation zone nungi jenboteta lir. Tesüiba league asaya 11 nungi par teloki asaya ka danga makok.

BILEMDANGANG

"Ochi jembidang aika temulung yiruadoker."